

मार्निंग डोगरी न्यूज़ बुलेटिन, समें. 09.20 Hrs

<><><><><><>

एह आकाशवाणी जम्मू ऐ, बडलै खबरें च तुंदा सुआगत, पैहले खास-खास खबरें कन्नै प्रोमिला जम्वाल।

Headlines

- 1- राष्ट्रपति होरें प्रधानमंत्री दे ओहदे लेई चुने गेदे नरेंद्र मोदी होरें गी केंद्र च नमी सरकार बनाने लेई साददा दिता ऐ। कल राष्ट्रपति भवन च शपथ ग्रहण समारोह लोआया गोआ।
- 2- जम्मू-कश्मीर च असेंबली चुनांस करोआने आहली भेठा इक गेंह बधांदे होई चुनांस आयोग नै सियासी पार्टिएं गी चुनांस निशान अलॉट करने आहली प्रक्रिया रम्भ करी दिती ऐ।
- 3- लेफ्टिनेंट गवर्नर मनोज सिन्हा होरें माता खीर भवानी मेले ते ईद-उल-अधहा दिएं तैयारिएं दा लेया जायजा।
- 4 एफ.आई.एच हॉकी प्रो. लीग तैहत अज्ज भारत ते जर्मनी बश्कार लंदन च मैच खेड्ढेआ जाग। हुन खबरें दी तफसील कन्नै जगमोहन शर्मा।

<><><><><><>

PM-President

राष्ट्रपति द्रौपदी मुर्मू होरें केंद्र च नमी सरकार बनाने लेई नामजद प्रधानमंत्री नरेंद्र मोद होरें गी साददा दिता ऐ। शपथ ग्रहण समारोह कल संझा सवा 7 बजे राष्ट्रपति भवन च होग। मोदी होरें कल राष्ट्रपति भवन च मलाटी कीती ही ते नमी सरकार बनाने दा दावा पेश कीता हा। एहदे शा पैहले बीजेपी अध्यक्ष जे.पी नड्डा हुंदे नेतृत्व च एनडीए दे इक प्रतिनिधिमंडल नै बी राष्ट्रपति हुंदे नै मलाटी करिए इक चिट्ठी उनेंगी सौंपी ही जेदे च आखेआ गोआ हा जे नरेंद्र मोदी होरें गी बीजेपी संसदीय दल दा नेता चुनेया गोआ ऐ। एनडीए दे भ्याल दलें दी तरफ समर्थन आली चिट्ठी गी राष्ट्रपति होरें गी सौंपेया गोआ। मगरा राष्ट्रपति भवन दे बाहर बोलदे होई मोदी होरें आखेआ जे एनडीए इक मजबूत, स्थिर ते विकास आली बक्खी अगड़े बधने आली सरकार बनाग। उनें

आखेआ जे राष्ट्रपति होरें उनेंगी नामजद प्रधानमंत्री नियुक्त कीता ऐ ते उनें उनेंगी सूचित कीता ऐ जे ओह ऐतवारें शामी होने आले शपथ ग्रहण समारोह गी लेइए बड़े सैहज न, उनें दस्सेया जे राष्ट्रपति भवन जिच्चर बाकी तफसीली मुद्दें पर कम्म करोग, उच्चर उसी मंत्री परिषद दी लिस्ट सौंपी दिती जाग। मोदी होरें आखेआ जे लोके एनडीए सरकार गी इक होर मौका दिता ऐ ते एह 18मीं लोकसभा नमीं ते नौजवान शक्ति दा सदन ऐ। उनें आखेआ जे उंदी सरकार मुख्यै दे लोके दिएं आसें-तांगें ते मेदें गी पूरा करोग। नामजद प्रधानमंत्री होरें आखेआ जे सरकार भारत ते एहदी अिर् बवस्था दे कन्नोकन्नी नौजवानें लेई बी फायदेमंद साबत होग। उनें मुख्यै गी भरोसा दोआया जे उंदी सरकार देसै दा बड़ी तेज रफ्तार कन्ने विकास करने च कोई कोर कसर नेई छोड़ग। एहदे शा पैहले राष्ट्रपति भवन नै इक सोशल मीडिया पोस्ट च आखेआ हा जे राष्ट्रपति मुर्मू होर संविधान दे धारा 75 (1) दे तैहत हासल इखतयारें दा इस्तेमाल करदे होई नरेंद्र मोदी होरें गी प्रधानमंत्री दे ओहदे पर नियुक्त कीता ऐ। राष्ट्रपति होरें मोदी होरें गी आखेआ ऐ जे ओह केंद्री मंत्रिपरिषद च शामिल कीते जाने आलें दे नाएं बारै जानकारी देन ते राष्ट्रपति भवन च लग्गने आले शपथ ग्रहण समारोह दी तरीक ते समें बारै बी पुच्छेया हा।

<><><><><><>

EC-JK Polls

जम्मू-कश्मीर च सितंबर म्हीने कोला पैहले-पैहले अपने विधानसभा चुनां करोआने दे अपने वायदे दी बतें पर इक अगड़ी गें पुट्टदे होई चुनां आयोग नै इक्के नेहा यानि समान चुनां निशान मंग्गने आली सियासी पार्टिं कोला दरखास्तां लैने दा फैसला कीता ऐ। सुप्रीम कोर्ट नै पिछले बरे दिसंबर म्हीने च निर्वाचन दल गी निर्देश दिता हा जे जम्मू-कश्मीर च विधानसभा चुनां 30 सितंबर कोला पैहले करोआए जान। इक प्रेस विज्ञप्ति च भारतय चुनां आयोग नै आखेआ ऐ कि जिसले मानता हासल राष्ट्रीय ते राज्य स्तर दिएं पार्टिं नै अपने रिजर्व चुनां नशान होंदे न, उस सूरतें च पंजीकृत गैर मानता हासल पार्टिं गी सांझे चुनां निशान लेई अपने मेदवार गी चुनां मदान च तोआरने लेई दरखास्त देनी पौंदी ऐ। लोकसभा चुनां जम्मू-कश्मीर च

लोकें दे बधी चढ़िए मतदान च हिस्से लैने कन्ने बड़े मते उत्साहित मुख चुनां आयुक्त राजीव कुमार होरें जम्मू-कश्मीर च विधानसभा चुनां करोआने दी प्रक्रिया तौलें शुरू करने दी गल्ल आकखी ही।

<><><><><><>

CS-Tavi Front

मुख सचिव अटल डुल्लू होरें कल जम्मू च तवी रीवरफ्रंट ते मसनुई झील विकास परियोजना पर चला रदे कम्मै दा जायजा लैता। मीटिंग दौरान मुख सचिव होरें जम्मू दा शलैपा बधाने दे मकसद कन्नै शुरू कीती गेदी इस परियोजना गी बेल्ले सिर मुकम्मल करने लेई बकख-बकख विभागें बश्कार तालमेल ते नेड़े थमां निगरानी दी महत्ता पर जोर पाया। इस परियोजना पर अंदाजन 191 करोड़ 15 लकख रपे खर्च औग ते इस बरे सितंबर म्हीने एहदा निर्माण कम्म सबूरा होने दी मेद ऐ। मीटिंग दौरान परियोजना तैहत कीते जा रदे कम्मै-कार्जे जियां तवी दा बाह्या मोड़ने, जलद्वार लाना ते हासल जिमीं गी रिहायश, बन्ज बपार ते मनोरंजन आस्तै इस्तेमाल करने बारै गल्लबात कीती गई। मुख सचिव होरें परियोजना दे तौले सबूरा करने ते म्यारी नतीजे पर जोर पाया।

<><><><><><>

Samba killing

साम्बा जिले दे रीगल इलाके च अंतरराष्ट्री बन्ने कश गोली चलने दी इक घटना च इक श्रमिक दी मौत होई गई ऐ। आकाशवाणी दे जिला संवाददाता सतपाल शर्म नै एसएसपी सांबा विनय शर्मा हुंदे हवाले कन्नै खबर दिती ऐ जे मारे गेदे आदमी दी पंछान 28एं बरें दे वासूदेव दे तौरा पर कीती गई ऐ जेड़ा अखनूर दा बसनीक हा। इस घटना दे तुरत बाद एसएसपी सांबा ते बीएसएफ दे सीनियर अफसर उत्थे पुज्जी गे। मामले दी जांच कीती जा रदी ऐ। होर ब्यौरै गी बलगेआ जा रदा ऐ।

<><><><><><>

Eid-J&K

ईद-उल-अजहा जिसी बड्डी ईद जां बकरीद बी आखेआ जंदा ऐ पूरे जम्मू-कश्मीर च इस म्हीने दी 17 तरीक गी मनाई जाग। जम्मू-कश्मीर दे गेंड मुफ्ती, मुफ्ती नसीर उल इस्लाम फारूकी हुंदे हवाले कन्नै खबरें मुजब इस्लामी कलेंडर दे खीरले म्हीने दा पैहला चन्न कल दिक्खेआ गेआ। इस करिए ईद 17 तरीक गी मनाई जाग।

<><><><><><>

ते हुन बाकी दिएं खबरें कन्नै जगमोहन शर्मा।

LG-Arrangements

लेफ्टिनेंट गवर्नर मनोज सिन्हा होंरें कल इक उच्ची सतह दी मीटिंग दी अध्यक्षता कीती ते जिला प्रशासन ते बक्ख-बक्ख विभागें आस्सेआ सलाना माता खीर भवानी मेले ते ईद-उल-अधा लेई कीती जा रदिएं तैयारिएं दा जायजा लैता। लेफ्टिनेंट गवर्नर होंरें डिप्टी कमिशनरें ते पुलीस विभाग दे एसएसपी'ज़ गी ताकीद कीती जे ओह निजी तौरा पर महत्वै आहिलएं धार्मिक थाहरें दा दौरा करन ते आवा रदे पवित्र आयोजनें गी बेहतर ढंग्गै सिर अमन-शांति कन्नै तोड़ चाढ़ने लेई कोई कसर बाकी नेई रक्खन। सिन्हा होंरें डिविजनल कमिशनरें ते राहत कमिशनरें गी आपें-चें तालमेल बनाइये कम्म करने लेई आखेआ तां जे माता खीर भवानी मेले, औने आले श्रद्धालुएं गी सब्बे सुविधां दितियां जाई सकन। उनें अफसरें गी इब्बी निर्देश दिते जे मौसम खराब होने दी सूरता च पैहले थमां नेह इंतजाम करी रक्खन जे श्रद्धालुएं गी कुसै औख-मुश्कल दा सामना नेई करना पवै। मुख्ख सचिव अटल डुल्लू डीजीपी आर.आर स्वैन, डिविजनल कमिशनरें, डिप्टी कमिशनरें ते सिविल ते पोलीस प्रशासन दे सीनियर अफसर बी इस मौके मीटिंग च मौजूद हे।

<><><><><><>

RBI-Repo Rate

रिजर्व बैंक नै दमासी मुद्रा नीति समीक्षा च रेपो दर साइडे 6 प्रतिशत पर गै रखने दा फैसला कीता। बैठक च लैते गेदे फैसलें दी घोषणा करदे होई बारबीआई गवर्नर शक्तिकांत दास होंरें आखेआ जे मुद्रास्फीति ते आर्थिक बाद्दे विकास दा संतुलन माकूल रेया ऐ। उनें आखेआ मुद्रा नीति समिति सामान्य मानसून दी संभावना कन्नै खाद्य मुद्रा स्फीति पर नजर बनाई रक्खोग। रिजर्व बैंक नै इस माली बरे लेई आर्थिक विकास दर अंदाजा 7 प्रतिशत थमां बधिचै 7 अशारिया 2 प्रतिशत करी दिता ऐ।

<><><><><><>

Kathua-NH

लखनपुर कोल लेइए जम्मू तोड़ी राश्ट्रीय जरनैलीसड़कें पर गड़डिं दी आओजाई बवस्थित ते सुचारू बनाने ते सड़क हादसैं दी दर गी घट्ट करना यकीनी बनाने लेई राश्ट्रीय जरनैली सड़कें सरबंधी भारती प्राधिकरण नै सड़कें गी चैड़ा करने, नमें फलाई ओवर बनाने ते केईं थाहरें सड़कें हेठा लंग्गने आले रस्ते बनाने दा कम्म शुरू कीते दा ऐ। केईं ऐसियां थाहां जित्थे सड़क हादसैं दी शैंका मती बनी दी रौहंदी ऐ, उंदा इनें निर्माण ते विस्तार दे कम्में च मता ध्यान रक्खेआ जा रदा ऐ। आकाशवाणी दे जिला संवाददाता प्रदीप शर्मा कन्नै गल्ल करदे होई एह जानकारी दिती।

<><><><><><>

FIH-Hockey

एफ.आई.एच हाकी प्रो-लीग च अज्ज लंदन च भारत दा मुकाबला जर्मनी कन्नै होग। एहदे शा पैहले होए दे मुकाबले च भारत नै जर्मनी गी 3-0 कन्नै हराया हा। भारती टीम दी अजें तगर दी कारकर्दगी बारे बोलदे होई उप कप्तान हार्दिक सिंह होरें गलाया जे उनें बधिया हाकी खेड्ठी ऐ पर अजें बी केईं सारे खेतरें च सुधार दी गुंजैश ऐ। भारती टीम दा मुकाबला कल मेजबान बरतानिया दे कन्नै होग। भारती टीम एल्लै अंक तालिका च चौथे नंबरें पर ऐ कीजे भारत नै अजें तगर दे 14 मैचें चा 24 अंक हासिल करी लैते दे न। तोआई जर्मनी एल्ले 6मीं थाहरें पर ते मेजबान बरतानिया 7मीं थाहरें पर ऐ। अंक तालिका च अर्जेन्टीना 29 अंके दे कन्नै पैहली थाहरें पर ते नीदरलैंड्स 26 अंके कन्नै दुए नंबरें पर ऐ।

<><><><><><>

Amarnath-Yatra

संघ शासित प्रशासन नै 52 दिन चलने आली सलाना अमरनाथ जातरा लेई जेड़ी इस म्हीने दी 29 तरीकें थमां शुरू होआ रदी ऐ-जम्मू च भगवती नगर आले आधार शिविर च चला रदिं तैयारिं गी मुकम्मल करने लेई

20 जून तक दी समे सीमा तैय कीती ऐ। डिविजनल कमिशनर जम्मू रमेश कुमार ते अतिरिक्त डीजीपी आनंद जैन हों कल आधार शिविर दा दौरा लाया ते चला रदे कम्में-कार्जे दा जायजा लैता। डिविजनल कमिशनर हों अधिकारिं गी 20 जून तगर मरम्मती ते दुए निर्माण आले कम्में गी मुकम्मल करने दे निर्देश दिते।

<><><><><><>

Weather

जम्मू च कल दिनें दा बदोबद तापमान 38 इशारिया 6 डिग्री सैल्यिस रिकार्ड कीता गेआ पर अज्ज बड्डलै सवां गै मौसम सुहाना बने दा ऐ ते गासै पर अददे दुब्बे तौरा पर बदल घनोए दे न। मौसम विभाग नै अज्ज ते कल कुसै-कुसै थाह कनी-कनोन ते किश थाहें गर्जी चमकिए बरखा बरने दे असार दस्से न। जिसले के 10 जून मगरा गर्मी परतिए अपना रंग दस्सी सकदी ऐ।

<><><><><><>